

2 PIYTA

Piyta Minj Kisen Tikak

Minim Nind Niņep

Piyta minj kisen tikak biy aņgak, “Nimb Gor ker mindpim gok, aņgip rek giy mindrep ginimimb. Pen Gor aņgip rek aspun aņgiy, minim yesek apay ak ma dinimimb; Jiysis Krays minim niņind yimb aņgāinuk anep direp giy, andkind winiņgamb nīn ak kond mindenimimb aņgak.”

Minim Ar Keykey Mindip Rek:

Minim nind aņgak ak mindip, chapta 1:1-2.

Gor ker mindpim rek, mindrep ginimimb aņgak minim ak mindip, chapta 1:3-21.

Biyimb Gor minim yesek apay gok, minim kuyip ak ma niņnimimb aņgak minim ak mindip, chapta 2:1-22.

Jiysis kisen andkind winiņgamb aņgak minim ak mindip, chapta 3:1-18.

1 ¹Yand Saymon Piyta, Jiysis Krays nup woņg giy, minim nup dand tapiyn. Minj tiksipiyn kun biy, nimbip biynimb Jiysis Krays Gor suņ-tep chin ak gos tep nīyiņg, biynimb di Nop yip jimnīy ayip ak niņiy, nup chingem, jimnīy tep gakniņ mindpun gok tiksipiyn. ²Nimb Biyomb chin Gor apiymiņay kuyip gosimb niņmindem, nimbip kond minder, mindrep giniņgambim.

Gor Nuk Key Chinup Niņay Dak Ak, Nup Chingrep Ginjun

³Gor Biyomb tep yimb ak, biynimb yand mindeyay aņgiy, chinup niņayak ak mey; nup gosimb niņbun. Kun ak mindrep giniņg nup chingrep giy, tap siy tap timey ar ak kirgiy tiņ nup diy, mindrep giniņgambun. ⁴Nuk gek mindrep giniņgambun kun ak; tap timey, gos timey lum ar biy mindiy niņbay ak kirginiņgambun.

⁵⁻⁶Pen kun giy mindrep giniņg, Gor nup gosimb niņbim rek nep niņmindiy, monmon ma giy, gos niņrep giy, mindrep ginimimb. Gos

nimbip key wip rek ma giy, Krays nup chin̄giy nep mindenimimb. ⁷Mam ay gok kuyip direp giȳng, biynimb yikop gok sek wasemb aynimimb. ⁸Pen Krays nup gosimb nīnbim rek, apiyn ar kun ak giy mey, Gor nup wōng ak gem, amrep yimb giningamb. ⁹Pen nimb gunap minim āngiy tiksīpiyn kun biy, ma nīnningambim ak; biynimb windin koy gok mey, kun giningambim. Biynimb kun gok rek, Gor kuyip tap siy tap timey geyak, gach wiykyokak ak sakiy giy, nup gosimb nīn̄nep ma mindpay.

¹⁰Pen mam ay tep yand gok. Kun ak rek ma ginimimb. Gor gos nuk key nīn̄jiy nimbip dip ak, kilis giy biynimb nuk mindenimimb. Apiyn rek giy mey, ma apyap pikningambim. ¹¹Pen Ñinuk Jiysis Krays chinup āngiy kumak ak apiy, nimbip wasiw giȳng, di biynimb nuk per kond mindeningamb namb ak ay, kond mindeningamb.

¹²⁻¹⁴Kun ak yand Piyta, nimbip minim kun ak, āngȳng nep mindeningayn. Biyomb chin Jiysis Krays, yip kumningamban āngiy ñin āngayak ak, māj wip ak mey; ¹⁵mumbwak sek mindpiyn ñin biy, nimbip minim kun ak, āngȳng nep mindpiyn. Kun ak sakiy ma ginimimb; nīn̄ȳng mindenimimb.

¹⁶Nimbip Jiysis Krays Biyomb key yimb mindiy winingamb āngnuk ak; minim nep ma āngnuk. Nind Biyomb kun ak key yimb ayek, windin chin key nīn̄jiy, nimbip āngnuk. ¹⁷⁻¹⁸Ñin kun ak, nuk yip am dum bap mindnuknī, Gor melik tep ak ap Ñinuk yip mindaknī, yimb nup dand aranȳng āngak, “Bi biy Ñi mapin tep yand; nup nīn̄en yip tep yimb gip āngak.”

¹⁹Kun ak bi Gor minim āngep minim āngyak gok, yesek ma āngyak; minim pisnep dep gok nep āngyak. Minim āngyak kun ak, lam kisyimken dāngiy ayey, chinup melik yomimb rek ak gip. Melik kun ak, nīndand amiy, gap pōnglin mīñmon yowning gaknī arachakip rek ak, lim giningamb gos namb nimbip biyā. Lim gek mey, mīñmon pisnep yowip rek ak giningamb. ²⁰Pen minim nokom bap nīn̄rep ginjun. Biynimb gunap Gor minim ak yand nep nīn̄biyn; nimb ma nīnbim āngiy, āngnīngiy rek ma ayip. ²¹Yenen: bi Gor minim āngep gok, Baybol buk minim ak tiknīng, key nīnyak rek ma tikyak; Gor Kawnan ak kuyip gos ñaknī nep tikyak.

Bi Gor Minim Aspun Āngiy, Minim Yesek Āngñimbay Gok

2 ¹Wosrey bi gunap, Gor minim aspun āngiy, biynimb chin Yisrel kuyip minim yesek āngñiȳngipay. Giyak kun ak rek, biynimb gunap namb nimbip ak mindiy, kunep giningambay ak nīn̄rep ginimimb. Biyomb kuyip āngiy kumak ak nup, Biyomb mer āngiy āngjiw mindȳng, ma nīn̄ningambay won ak Gor gek, yiwur yomb yimb ak diningambay. ²Pen biynimb kūjaynep minim kuyip ak diy, tap siy tap timey giȳng, biynimb Krays nup kisen gipun gok, yimb chinup taw achip achip

giningambay. ³Maniy tap gok dun angyi, minim yesek yimb gok angningambay. Kun giningambay ak pen, Gor nuk niņnep mindip; kor yomb kun ak key niņningambay. ⁴Gor enjol tap siy tap timey giyak gok kuyip ma kirgak; miñ kilis timey ak ay, kaw mingan kisyim wip biyaņ yokek, kor ak kond mindpay. ⁵Pen biynimb nup alemb alemb niyak gok simb ma niņy, gek miñmon yomb ak pikiy niņg tan araneke, maņgiyseke niņg niimbis kumdiyak. Nowa sek, biynimb nuk onep ar ak sek kuyip nep kond mindek, kim amniyak. ⁶Pen biynimb yip kirginingambay gok, kuyip giningamb rek, maņgiyseke niņrep giyaņ angyi, mon maņlaņ ak semb biyoņ nimb yokek apiy, Sodom Gomora biynimb kuyip, pisnep yin simbok amnak. ⁷⁻⁸Pen binak Lot nup sek ma yinak; Gor nup kond mindiy, dand mis okok amnak. Nuk bi tep namb kiyk okok mindiy, minek minek timey giyak ak niņek, yiruk yimb giyinyip. ⁹Kun ak chin niņbun: tap bap Gor biynimb tep nuk gok kuyip ginying gek, nuk kuyip kond mindeningamb. Pen biynimb nup kirpay gok angyayek, miker diyiny, kor yomb ak kond mindeningambay. ¹⁰Kor yomb kun ak, biynimb minim ma niņy, gos kiyk key wip rek gipay gok kuyip angak.

Gor minim aspun angyi, yesek apay kun gok, jel ma gek, enjol tep semb biyoņ gok kuyip, monmon angyiwpay. ¹¹Enjol gok pen, kun ak rek ma gipay. Kiyk biyomb rek mindpay ak pen, bi minim yesek angyep kun gok, yerer gipay minim ak, Gor nup angninying, kuyip angyiwyinying yimb kuyip ma taw achip achip gipay. ¹²Pen bi Gor minim aspun angyi, nimbip minim yesek angnimbay kun gok, kanj kimin tap yikop gok, gos ma niņy monmon gipay rek ak gipay. Gipay kun ak, kanj kimin gon ayey dip rek ak, kuyip ginyingamb. ¹³Timey giyinying, pumbnamb tap yomb niimbinying, niņg kilis niimbinying monmon gi dand amiy, nambiņ ma dipay ak; pen yiwur diniņgambay. Pen nimb Gor nup wasemb ayinying ap nan-giy, biret wayn niimbim niņ gok, ap nimb yip wilikpay ak, tep ma gip. ¹⁴Tap gok chin nep minden angyi gos anep ayek, biyn siy dun angyi, windin ay nep tapay. Biynimb Krays nup chinying ma gipay gok kuyip, nembnemb gi dand kind kiyk ak amey, tap siy tap timey gipay. Bi yesek apay kun gok, Gor kuyip yiwur yomb yimb ak niņningamb.

¹⁵Kiyk kinney tep ar ak kirgiy, bi Beyow niņuk Balam maniy tap gok diyn angyi, Gor minim ak yesek angninying gek rek ak gipay. ¹⁶Kanj dongyi gok, minim ma apay ak pen, dongyi nuk ak nup bi apay rek angy gek, yesek angninying gek kun ak kirgak.

¹⁷Pen minek gunap, niņg malniņg amiy niņbun: niņg kilam jiwip gok milip gip. Minek gunap miñmon pikniņg gek, yinying yomb apiy liņgek, ma pikip. Kun ak rek mey; Gor minim angnispun angyi, pen yesek nep apay gok. Kun gipay ak, Gor kuyip angy kisyim wip namb okok yokningamb.

¹⁸Bi kun gok, yimb kiyk key dand aranyinying apay, “Chinup kisen gem, mindmaņgyi tikjakniņgamb rek monmon ginyingambim apay.” Kun angyey

mey, biynimb bungiy kiyk gok yip monmon gi dand amiy, kisen nep mindrep gipay gok gos ñey, tip ak tap siy tap timey gipay. ¹⁹Gipay ar kun ak, kalambis woŋg kiyk rek ayip ak kirgiy, yikop mindeniŋgiy rek ma ayip. Pen biynimb kuyip minim aŋgñimbay gok kunep, kalambis woŋg kun ak rek gey amek, yikop mindeniŋgiy rek ma ayip. ²⁰Nind Jiysis Krays nup gosimb niŋiy, biynimb yip tangiy monmon giyiŋgipay gok, kirgiy mindrep giyak ak pen; tip ak gey amek, yikop mindeniŋgiy rek ma ayip. ²¹Suŋ-tep mindeniŋgiy miñ ak ma niŋbiyap ak, tep rek gipkop. Pen Gor chinup aŋgak ak niŋiy kirpay ak, tep ma yimb giniŋgamb. ²²Kiyk minim omiŋal wosrey aŋgyiŋgipay ak rek gipay. Minim omiŋal kun ak aŋgyak: “Kayn gok wokay andkind apiy, tap wok aypay ak tip ñimbay.” “Kanj gok ñiŋg pikiy, andkind amiy, tip ak wilemb kolkol gipay aŋgyak.”

Biyomb Ak Niŋind Aŋgip Kasek Winiŋgamb

3 ¹Biynimb tep yand gok. Nimbip minj bap nind tikyokiy, miñiy bap tiksiyiyn ak; minim kun ak tip aŋgen niŋrep giy, gos tep yimb ak niŋnimimb aŋgiy tiksiyiyn. ²Bi Gor minim aŋgep suŋ-tep gok sek, bi Jiysis minim dand amemb nimb gok sek minim aŋgñiyak rek, niŋmindenimimb apiyn.

³Pen niŋim: ñin kisen mindpun biy rek, biynimb minim tep ak aŋgiwiy, gos key niŋbay rek giy mindrep ma gipay gunap, nimbip aŋgningambay, ⁴“Bi winiŋgayn aŋgiy aŋgayak ak, winiŋgamb miŋgan akay nimb? Biynimb nindik gok mindyakniŋ, winiŋgayn aŋgak ak pen; kiyk kumdiypay ak ma wip. Alwol gayak ñin ak, mindek rek nep mindip aŋgningambay.” ⁵Bi kun gok, Gor miñmon gay kond mindip ak, niŋrep gipay ak pen; ñinen kirpay. Pen nuk nep aŋgek, semb biyoŋ ay, ñiŋg ak kus kus giy, man ak namb biyaŋ ay gak. ⁶Kisen aŋgek, ñiŋg ap mankumb biy yiwgek, pisnep timey gak. ⁷Pen nuk nep aŋgek, semb biyoŋ, man biy mindrep gisap. Biynimb nup kirpay gok kuyip, kor giy yiwur yomb ñiniŋgayn ñin ak, pisnep daŋgiyen yiniŋgamb aŋgiy niŋmindip.

⁸Pen biynimb tep yand yimb gok. Minim bap sakiy ginimimb rek ayip. Chin simiy kuŋay yimb nep ñin paŋg niŋbun ak pen, Gor niŋek, ñin nokom bap rek ayip. ⁹Kun ak nuk winiŋgayn aŋgiy kasek ma wip ak, biynimb gunap minim nep aŋgiy kirpay rek ma gip; biynimb tap siy tap timey giy, mon key yinŋap amniŋ gispay gok, gunap ma kurginiŋgiy, yip ker apey, kuyip diyn aŋgiy, kond mindip.

¹⁰Pen Biyomb winiŋgamb ak; bi tap siy dep gok, niŋmindey ma opay rek ak winiŋgamb. Ñin kun ak, giw parsek aŋgakniŋ, semb muk biyoŋ keykey amniŋgamb. Gap tap yerip yerip semb biyoŋ mindip gok yiniy, man biy tap yerip yerip mindip gok maŋgiysek yiniŋgamb.

¹¹Maŋgiysek yiniŋgamb kun ak rek, mindrep ginjun akaŋ monmon ginjun? Ñin yomb winiŋgamb kun ak niŋiy, Gor aŋgip rek giy mindrep

ginjun. ¹²Pen minim tep nup ak, biynimb okok kuyip angying mindon, ñin yomb nuk ak kasek winimuŋ. Ñin kun ak, takin, gap, tap semb biyoŋ gok, yin ñiŋband tikniŋgamb ak pen; ¹³Gor semb biyoŋ sek, man biy sek kisenimb giniŋgayn angyi, minim angyayak ak kond mindpun. Namb kun ak, tap siy tap timey bap ma giy; nuk yip mindiy, mindrep yimb giniŋgambun.

¹⁴Kun ak biynimb tep yand gok. Nuk asaw angyi kond mindpim ñin biy, jimñiy mindiy, biynimb suŋ-tep minim ma mindip gok mindonjun angyi gem amek mey, ap nimbip niŋek tep yimb ginimuŋ. ¹⁵Pen nuk kasek ma wip ak; biynimb gunap sek yip ker wiyaŋ angyi, kond mindip. Gor mam tep chin Pol nup gos tep ñakniŋ, nimbip minj tikiy, minim nokom kun ak rek angak. ¹⁶Minj nuk tikak gok, minim kosyam niŋep rek gunap sek angek mey; biynimb mindrep ma gipay gok niŋiy, minim kun ak tuŋgandikiy, minim yesek ar ak apay. Pol nup minim ak nep kun ma gipay; Gor minim bi gunap tikyak ak kunep gipay. Gipay kun ak, kinjeŋ kiyk bap ma mindip.

¹⁷Pen biynimb tep yand gok. Gos niŋbim kun ak, niŋrep ginimimb. Mer ak, kiyk gos timey niŋiy, timey gipay rek giy, apyap pikniŋgambim. ¹⁸Pen Biyomb chin Jiysis Krays biynimb simb niŋiy, di Nop yip jimñiy ayip ak nup niŋbim rek; nup niŋrep yimb giy, mindrep yimb ginjun angyi mindenimimb. Bi tep chin kun ak, yimb nup ak pernep dand araniŋgyi! Tep.